



Soraarnerussutisiaqalernissamut aaqqissuussinermut pinngitsoorani ilaanissaq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortat Hans Enoksen, Pele Broberg, Jens Napätôq, Partii Naleraq)

Inuit sulilluartorpassuit nunatsinnut tunniussaqaqluarlutik sulilluarsimasut utoqqalinissaminut toqqissisimallutik pitsaasumillu takorluungaqaqtitsisinnaasunik inuiaqatigiittut pitsaasunik sinaakkusiinissarput Demokraatinut pingaaruteqarpoq. Ullumikkulli ajoraluartumik imaappoq utoqqalinersiallit amerlasuut pensionistinngornermi isertitamikkut – taamaalillutillu inuuniarnikkut – appartoorujussuarnermik nalaataqartussat.

Ajornartorsiummut aaqqiissutissaq qaninnerpaaq tassaagunarpoq utoqqalinersianik qaffaagaatsiarneq, tamattali nalugunangilarput taamaalorsinnaangitsugut. Politikeritut inuiaqatigiit aningaasaataannik tullerriarisussaavugut, utoqqalinersianillu qaffaanissamut aningaasanik nassaarniarnissaq periarfissaangilaq. Sammisarpassuit allat aamma qaffaavigineqarnissamut pisariaqartitsiput. Assersuutigalugumi taasinnaavakka peqqinnissaqarfik, meeqqat atuarfiat, meeqquariveqarneq, isumaginninnermi suliaasaqarfik ilaalu ilanngullugit.

Taamaammallu sulinermit utoqqalinersiaqarlernissamut ikaarsarneq ullumikkutuut artornarpallaanginnerutinniarlugu sinaakkutissatut pilersitsiniarnitsinni allatoqqinnaaq eqqarsartariaqarsimavugut. Tassa naatsunnguannorlugu tamanna tunngavimusimavoq amerlanerussuteqaqluarlut – Partii Naleraq aamma – UKA2016-imi soraarnerussutisiaqarnissamut aaqqissuussinermut pinngitsoorani ilaanissamut siunnersuummut akuerseqataasimaneranut.

Soraarnerussutisiaqarnissamut katersineq inuinnaat aningaasanik atuinissaraluarlut inuunermit kingusinnerusumut utaqqisinnerqarnissaannik kinguneqartitsissaaq. Sulisinnaanerup nalaani aningaasarsiat atornagit isertat ilai aatsaat innuttaasup soraarnerussutisiaqalernermit atorsinnaangussavai. Taamaalillunilu innuttaasup inuunera tamaat isigissagaanni isertitat agguataarluarnerussapput. Taamatut inuunerup ingerlaneranut agguataarineq aningaasarsiornikkut imminut napatikkusunnermut, inuillu ataasiakkaat akisussaassuseqarnerannut tunngaviannut tulluuppoq.

Allatut oqaatigalugu soraarnerussutisiaqarnissamut katersineq utoqqalinersiuteqalernermit pisarnermit amerlanermit aningaasaateqalernermit kinguneqartitsissaaq. Taamaalillutik soraarnerussutisiaqarnissamut katersat, inuit ataasiakkaat sulisuunermit soraarnerussutisiaqarnissamut alloriarnerup sakkortuvallaanginnissaa pinaveersaartissavaat. Pitsaanerpaassangaluarpoq pensionistinngorlaat soraarninngornermit inuuniarnermit atukkatigit appartoorpallaartanngikkaluarpata. Tassunga soraarnerussutisiaqarnissamut katersat naatsorsuutaasussaapput. Taassumallu saniatigut



puigorneqassanngilaq aningaasat katersorsimasat iluanaarutit erniallu pequtigalugit tunniunneqarnermi naleqarnerulersimanissaat ilimanarluinnarmat. 2016-imi siunnersuutip sammineqarnerani Aningaasaqarnermut Naalakkersuisoqarfiup naatsorsorsimavaa innuttaasoq sulinini tamaat ileqqaagaqarpat koruunimik ataatsimik akiliuteqarnerup koruunit sisamat missaannik tunineqarnermik naleqassasoq.¹

Utoqqalinermi soraarnerussutisiaqarnissamut aqqissuussinermut pinngitsoorani ilaanissap massakut utoqqalinersiallit inuunerannut naleqqiullugit kinguaariit utoqqanngortussat siunissami inuuniarnerat oqinnerulernissaat ilimanaateqarluarpoq. Tamanna piffissaq eqqorlugu qajassuussineruvoq, aammalu ungasinnerusumut isigaluni politikkiliornerulluni, asuli qaninnerusumut isigaluni politikikkikku qujangeqqusaaginnarani.

Taamaasillutillu Partii Naleqqamit siunnersuutigineqarpoq soraarnerussutisiaqarnissamut aqqissuussinermut pinngitsoorani ilaanissamut inatsit atorunnaarsinneqarallassasoq. Demokraatit isumaqataapput soraarnerussutisiaqarnissamut aqqissuussinermut pinngitsoorani ilaasarnissaq pequtigalugu innuttassut ikinnerusunik kaasarfimmiuteqartalernissaat ajoraluaqisoq. Ikinnernik aningaasaateqalernerq nuanniitsuaannarpoq. Tamannali taamani maani ataatsimiittarfimmi aqqissuussineq akuerigatsigu nalunngereeraluarparput. Taamanimi Partii Naleqqap aqqissuussineq akueraat nalunngereeraluarlugu massakkorpiaq kaasarfimmiut ikilissasut. Inatsisissatut siunnersuummut oqaaseqaatini erseqqilluinnartumik paatsuugassaannngitsumillu imatut allaqqasoqarpoq:

”Soraarnerussutisiaqarnissamut pinngitsoorani aqqissuussaqaarnissap kingunerissavaa innuttaasut ataasiakkaat ileqqaarnerulernerat, taamaalillutillu aningaasanik ikinnerusunik atugassaqaalernerat.”²

Iluaqutissartaqanngilaq politikkeritut aalajagiussimasagut attatiinnarnissai qunugigutsigit. Isumaqarpungali piffissap ingerlanerani ataasiakkaanik aqqiivigisariaqartarnissarput ilaatigut pisariaqarsinnaasassasoq. Tassunga isumaqataavugut. Inatsisilli atuuttup siunertarisamitut ingerlasoq Partii Nalaqqap tassanngaannaq paaseriataarsimammassuk atorunnaarsinneqarnissaa inissaminiingilaq.

Tassaangallarpullu Demokraatit oqallinnermut matumuuna ilanngukkusutaat.

¹https://ina.gl/dvd/EM2016/pdf/media/samlingsfiler/2860206/pkt19_em2016_obligatorisk_opsparing_bem_rettblad_kal.pdf (qup. 9)

²https://ina.gl/dvd/EM2016/pdf/media/samlingsfiler/2860206/pkt19_em2016_obligatorisk_opsparing_bem_rettblad_kal.pdf (qup. 8)